

18. oktober 2022

UKA 2022/60

Aqqusinikkut angallannermut oqartussaaffiup pigisanullu nalilinnut inatsisip tiguneqarnissaanut tunngavissat tamarmik nassuiaasiorfigineqarnissaat siunertaralugu Naalakkersuisut Naalagaaffiup oqartussaasuinut saaffiginequllugit peqquneqarnissaannik Inatsisartut aalajangiiffisassatut siunnersuut.

(Inatsisartunut ilaasortaq Kuno Fencker, Siumut)

Kuno Fencker Siumumeersup Aqqusinikkut angallannermut oqartussaaffiup pigisanullu nalilinnut inatsisip tiguneqarnissaanut tunngavissaasunik nassuiaasiorfigineqarnissaannik Naalakkersuisut Naalagaaffiup oqartussaasuinut saaffiginequllugit peqquneqarnissaannik siunnersuutaanut Siumumiit imaattumik oqaaseqaateqassuugut.

Nunatsinni Danmarkimilu aqqusinertigut angallannikkut maleruaqqusissutit tunngaviusumik amerlasuutigut assigiissuteqarput assingusinnaasarlutilluunniit. Isumannaatsuunissamik inatsisitigut maleruagassaqaarneq pitsaasuvoq tunngaviusariaqarlunilu.

Nunattali issittumi inassisimanagera aammalu nunaqariaatsip siammasisussiinera eqqarsaatigalugit, kiisalu nunatta iluani pinngortitap inuussutissarsiutillu assigiinngisitaarlutik atugassaqaartitsisuunerat eqqarsaatigalugit aqqusinikkut angallannermut oqartussaaffiup nunatsinniit akisussaaffigineqalersinnaanera nassuiaasiorfigineqarnissaa Siumumiit pissusissamisoortutut isumaqarfigaarput, taamaaliornikkut Namminersorneq pillugu Inatsimmi oqartussaaffiit nunatsinniit tiguqearsinnaasut tiguartuaarneqarnissaat aallartisarneqarsinnaammat.

Siumumiilli aamma pingaaruteqarluinnartutut isumaqarfigaarput akisussaaffinnik tigusinerit imaluunniit pilersitsinerit tassaasariaqartut inuiattut uagut nammineerluta ilusilersukkagut, nunatsinnut inooriaatsitsinnullu tulluarsakkat, imaangitsoq kupiiginnagaasunik oqartussaaffinnik nunatsinnut nussuineq.

Taamatutaaq Siumumiit pigisanut nalilinnut inatsisip tiguneqarnissaanut tunngassuteqartoq nassuiaasiorfigineqarnissaa aamma taperserparput, ilutigaluguli kaammattuutigerusupparput Naalakkersuisut oqartussaaffiit sulit nunatsinniit tigusimanngisagut Namminersorneq pillugu Inatsimmi allassimasut tiguneqarnissaat eqqarsaatigalugit pilersaarummik suliaqassasut, taamaaliornikkut akisussaaffiit tiguartuaarnissaannut suliaqarneq nalorninaatsumiinissaa timitalerneqarsinnaaqullugu.

Siumumiit naatsumik taamatut oqaaseqarluta siunnersuut ataatsimiititaliami suliaqqinneqarnissaa inassutigaarput.

Anders Olsen, Siumut